



## 2,600 ATLET DAN PEGAWAI SERTA SUKUM DI UMP

KUANTAN, 11 Ogos : Sejumlah 2,600 atlet dan pegawai yang mewakili 21 kontinjen universiti awam menyertai Sukan Staf Antara Universiti Malaysia (Sukum) ke-43 yang bermula di sini, malam ini.

Temasya tahunan yang berlangsung di Universiti Malaysia Pahang (UMP) itu merupakan kejohanan bagi staf-staf universiti awam seluruh Malaysia dengan mempertandingkan 17 acara sukan yang berlangsung mulai hari ini sehingga Sabtu depan.

Menteri Pendidikan Dr Maszlee Malik berkata, Sukum merupakan platform bagi menyatukan semangat perpaduan antara kakitangan universiti.

“Sukum menjadi penghubung serta menjadi medium memartabatkan sukan pendidikan di negara ini menerusi penglibatan pegawai dan atlet dalam kontinjen masing-masing.

Selain bersaing secara sihat dalam lapangan sukan, atlet dari semua kontinjen juga diharap dapat menghayati semangat kesukanan dan pada masa sama memanfaatkan Sukum sebagai medan perhubungan profesional secara santai,” katanya.

Teks ucapannya dibacakan oleh Timbalan Ketua Setiausaha Pembangunan Kementerian Pendidikan Datuk Kamel Mohamad.

Turut hadir Pengerusi Lembaga Pengarah UMP, Datuk Seri Ibrahim Ahmad dan Naib Canselor UMP, Prof Datuk Seri Dr Daing Nasir Ibrahim.